

L I G J
Nr. 8003, datë 28.9.1995

KODI PENAL USHTARAK

(Ndryshuar me vendimin e Gjykatës Kushtetuese nr. 65, datë 10.12.1999; me ligjin nr. 8919, datë 4.7.2002)

(i përditësuar)

Në mbështetje të nenit 16 të ligjit nr.7491, datë 29.4.1991 “Për dispozitat kryesore kushtetuese”, me propozimin e Këshillit të Ministrave,

KUVENDI POPULLOR
I REPUBLIKËS SË SHQIPËRISË

V E N D O S I:

DISPOZITA TË PJESËS SË PËRGJITHSHME

K R E U I
LIGJI PENAL USHTARAK DHE ZBATIMI I TIJ

Neni 1

Ligji penal ushtarak dhe ndarja e veprave penale

Ligji penal ushtarak përcakton veprat penale ushtarake, si dhe dënimet dhe masat e tjera që merren ndaj subjekteve që i kryejnë ato.

Veprat penale ushtarake ndahen në krime ushtarake dhe në kundërvajtje penale ushtarake. Dallimi i tyre bëhet në çdo rast në dispozitat e pjesës së posaçme të këtij Kodi.

Neni 1/a

Bazat e legjislacionit penal ushtarak
(Shtuar me ligjin nr. 8919, datë 4.7.2002)

Kodi Penal Ushtarak bazohet në Kushtetutën e Republikës së Shqipërisë, në parimet e përgjithshme të së drejtës penale ushtarake ndërkombëtare, në marrëveshjet ndërkombëtare të ratifikura nga shteti shqiptar dhe në ligje të tjera.

Legjislacioni penal ushtarak përbëhet nga dispozitat e këtij Kodi dhe ligje të tjera që parashikojnë vepra penale ushtarake.

Neni 1/b

Detyrat e legjislacionit penal ushtarak
(Shtuar me ligjin nr. 8919, datë 4.7.2002)

Legjislacioni penal ushtarak ka për detyrë të mbrojë pavarësinë e shtetit dhe tërësinë e territorit të tij, rendin kushtetues, të drejtat dhe liritë e shtetasve, rendin ushtarak të Forcave të Armatosura, pronën, autoritetin dhe disiplinën ushtarake, nga vepra penale ushtarake dhe parandalimin e tyre, si dhe të sigurojë pjesëmarrjen e shtetasve shqiptarë në mbrojtjen e Republikës së Shqipërisë.

Neni 2

Zbatimi i ligjit penal ushtarak

Shtetasit shqiptarë që kryejnë një vepër penale në fushën e mbrojtjes përgjigjen sipas Kodit Penal Ushtarak.

Për shtetasin shqiptar që kryen një vepër penale ushtarake në bashkëpunim me një ushtarak shqiptar do të zbatohet Kodi penal Ushtarak i Republikës së Shqipërisë.

Neni 3

Barazia e shteteve aleate

(Ndryshuar me ligjin nr. 8919, datë 4.7.2002)

Legjislacioni penal ushtarak zbatohet edhe kur veprat penale ushtarake janë kryer në dëm të një shteti të huaj aleat ose partner me shtetin shqiptar.

Neni 4

Zbatimi i ligjit penal në hapësirë

Ligji penal ushtarak është i zbatueshëm edhe për ushtarakun shqiptar që kryen një vepër penale jashtë territorit të Republikës së Shqipërisë, kur vepra është njëkohësisht e dënueshme dhe derisa nuk është dhënë për të një vendim përfundimtar nga një gjykatë e huaj.

Neni 5

Zbatimi i ligjit penal ushtarak për vepra penale ushtarake të kryera nga shtetas të huaj ose pa shtetësi

Shtetasi i huaj ose pa shtetësi që kryen një vepër penale në fushën e mbrojtjes përgjigjet sipas ligjit penal ushtarak.

Shtetasi i huaj ose pa shtetësi që në bashkëpunim me ushtarakë shqiptarë kryen një vepër penale ushtarake brenda ose jashtë territorit të Republikës së Shqipërisë, përgjigjet në bazë të ligjit penal ushtarak të Republikës së Shqipërisë.

K R E U I I

PËRGJEGJËSIA PENALE SIPAS LIGJIT PENAL USHTARAK

Neni 6

Personat që përgjigjen sipas ligjit penal ushtarak

(Hequr togfjalësh në paragrafin e parë, ndryshuar paragrafi i dytë dhe pika 7, shtuar paragraf me ligjin nr. 8919, datë 4.7.2002)

Me fjalën "ushtarak" kuptohen ata persona që bëjnë pjesë në forcat e armatosura.

Me fjalën "vartës" kuptohet ushtaraku ose personi me gradë, detyrë ose funksion më të ulët.

Me fjalën "kuadër ose person komandues" kuptohet personi, i cili për arsye të gradës, detyrës ose funksionit, ushtron autoritetin komandues kryesor, sipas shkallëve, nga njësitë më të larta deri në nënrepartin ose njësitë e ulëta.

Ligji penal ushtarak zbatohet:

1. Për ushtarakët në shërbim aktiv, nga koha e caktuar për paraqitjen e tyre në armë, deri në kohën që, sipas dispozitave ligjore, lirohen efektivisht nga shërbimi.
2. Oficerët aktivë në pritje për t'u sistemuar ose të pezulluar.
3. Ushtarakët që vuajnë dënime disiplinore me izolim.

4. Të thirrurit në stërvitje, prova gatishmërie e mobilizimi.
 5. Për të gjithë shtetasit që kryejnë një ose disa nga veprat penale në fushën e mbrojtjes.
 6. Studentët e shkollave të larta ushtarake ose kursantët që vazhdojnë kurset e kualifikimit ushtarak.
 7. Personat e tjerë që, sipas ligjit të veçantë, janë subjekt i këtij Kodi.
- Pavlefshmëria e rekrutimit ose paaftësia për të shërbyer në Forcat e Armatosura nuk e përjashton ushtarakun nga përgjegjësia penale, për vepra penale të parashikuara në këtë Kod.

KREU III D Ë N I M E T

Neni 7

Dënime kryesore

(Ndryshuar fjalë në pikën 4 të paragrafit të dytë me ligjin nr. 8919, datë 4.7.2002)

Për ushtarakët që kanë kryer krime jepen këto dënime kryesore:

1. Me burgim të përjetshëm a me vdekje.
2. Me burgim.
3. Lirim nga ushtria.
4. Me gjobë.

Për ushtarakët që kanë kryer kundërvajtje penale jepen këto dënime kryesore:

1. Me burgim.
2. Lirim nga ushtria.
3. Me gjobë.
4. Me ulje në gradë.

Neni 8

Dënime plotësuese

(Shtuar pikat 7 dhe 8 me ligjin nr. 8919, datë 4.7.2002)

Për ushtarakët që kanë kryer krime ose kundërvajtje penale, bashkë me dënimin kryesor mund të jepen edhe një ose disa nga këto dënime plotësuese:

1. Ndalimi i të drejtës për të ushtruar një detyrë shtetërore.
2. Konfiskimi i mjeteve të kryerjes së veprës penale dhe përfitimeve prej saj.
3. Ndalimi për të drejtuar automjetin.
4. Heqja e dekoratave, titujve të nderit.
5. Lirimi nga ushtria për ushtarakët e shërbimit të përhershëm aktiv.
6. Shtytja e afatit të gradimit deri në tre vjet.
7. Nxjerrja jashtë territorit ose dëbimi i individëve të huaj subjekte të këtij Kodi nga Shqipëria.

8. Detyrimi për publikimin e vendimit gjyqësor.

Gjykata, në raste të veçanta, kur dhënia e dënimeve kryesore çmohet e papërshtatshme dhe kur ligji parashikon dënim me burgim deri në tre vjet ose dënime të tjera më të lehta për veprën e kryer, mund të mjaftohet vetëm me caktimin e dënimit plotësues.

Neni 8/a

Dënimi me burgim të përjetshëm ose me vdekje

(Shtuar me ligjin nr. 8919, datë 4.7.2002)

Dënimi me burgim të përjetshëm jepet për kryerjen e një krimi të rëndë.

Për kryerjen e një krimi të rëndë në gjendje lufte ose në gjendje të jashtëzakonshme, gjykata

mund të japë dënim me vdekje.

Dënimi me burgim të përjetshëm ose me vdekje nuk mund të jepet ndaj personave që, në kohën e kryerjes së krimit, nuk kanë mbushur moshën tetëmbëdhjetë vjeç, si dhe për gratë.

Neni 9

Dënimi me burgim dhe me gjobë

Dënimi me burgim për krime ushtarake jepet për një kohë nga pesë ditë deri në njëzetepesë vjet, ndërsa për kundërvajtjet penale ushtarake për një kohë nga pesë ditë deri në dy vjet.

Dënimi me gjobë jepet për personat që kryejnë krim ose kundërvajtje penale ushtarake.

Për krimet ushtarake gjoba jepet nga pesë mijë deri në një milion lekë.

Për kundërvajtjet penale gjoba jepet nga tre mijë deri në njëqindmijë lekë.

Për ushtarët e shërbimit të detyrueshëm gjoba jepet nga njëmijë deri në pesëdhjetëmijë lekë.

Neni 10

Mënyra e vuajtjes së dënimit me burgim të përjetshëm dhe me burgim.

Ushtarakët e vuajnë dënimin me burgim të përjetshëm dhe me burgim në vende të veçanta nga të dënuarit civil.

Neni 11

Lirimi nga ushtria

Lirimi nga ushtria mund të jepet ndaj ushtarakëve të shërbimit aktiv të përhershëm që kryejnë krime ose kundërvajtje penale ushtarake.

Për krimet kjo masë është e përhershme, ndërsa për kundërvajtjet penale një vit.

Neni 12

Dënimi me ulje në gradë

(Ndryshuar fjalë në titull dhe në paragraf me ligjin nr. 8919, datë 4.7.2002)

Dënimi me ulje në gradë është ulje deri në dy gradë i ushtarakut që kryen kundërvajtje penale.

Neni 13

Zbatimi i dispozitave të pjesës së përgjithshme të Kodit Penal (civil)

Për personat që kryejnë vepra penale ushtarake, do të zbatohen edhe rregullat e pjesës së përgjithshme të Kodit Penal (civil) që nuk parashikohen në këtë Kod.

Neni 14

Zbatimi i dispozitave të pjesës së posaçme të Kodit Penal (civil) për ushtarakët

Kur ushtaraku kryen një vepër penale që nuk parashikohet në këtë Kod, do të përgjigjet në bazë të dispozitave të Kodit Penal (civil).

PJESA E POSAÇME

KREU I
VEPRA PENALE NË FUSHËN E MBROJTJES

Neni 15

Shmangia nga evidenca ushtarake

Shmangia e shtetasit shqiptar nga regjistrimi ose mosbërja e ndryshimeve në evidencën ushtarake të kryera më shumë se një herë përbën kundërvajtje penale dhe dënohet me gjobë ose me burgim deri në gjashtë muaj.

Neni 16

Shmangia nga thirrja për shërbim ushtarak

(Shtuar togfjalësh dhe ndryshuar fjalë në paragrafin e dytë dhe të tretë me ligjin nr. 8919, datë 4.7.2002)

Shmangia e shtetasit shqiptar nga thirrja për të kryer shërbimin e detyrueshëm ushtarak aktiv, kur nuk përbën kundërvajtje administrative, dënohet si kundërvajtje penale me gjobë ose me burgim deri në dy vjet.

Shmangia e shtetasit shqiptar nga thirrja për stërvitje ushtarake ose prova gatishmërie, ose mobilizim kur kryhet më shumë se një herë, përbën kundërvajtje penale dhe dënohet me ulje në gradë, me gjobë ose burgim deri në dy vjet.

Po këto vepra të kryera në gjendje lufte ose gjendje të jashtëzakonshme dënohen me burgim nga dy deri në pesë vjet.

Neni 17

Shmangia nga detyrimi për dorëzim teknike

(Ndryshuar togfjalësh në paragrafin e dytë me ligjin nr. 8919, datë 4.7.2002)

Shmangia nga detyrimi për dorëzimin e teknikës, të mjeteve të transportit, pajisjeve ose kafshëve të punës, kur kryhet më shumë se një herë, përbën kundërvajtje penale dhe dënohet me gjobë ose me burgim deri në gjashtë muaj.

Po kjo vepër e kryer në gjendje lufte ose gjendje të jashtëzakonshme dënohet me burgim deri në pesë vjet.

Neni 18

Mashtrimi për rekrutim

Çdo person që, për të rregulluar rekrutimin ose largimin e tij nga forcat e armatosura, paraqet të dhëna të pasakta ose i fsheh ato, kryen kundërvajtje penale dhe dënohet me gjobë ose me burgim deri në dy vjet.

Neni 19

Rekrutimi i paligjshëm

Çdo person që ndihmon personat e tjerë për të përfituar rekrutimin ose emërimin ose largimin nga forcat e armatosura pa plotësuar kushtet e parashikuara me ligj, kryen kundërvajtje penale dhe dënohet me gjobë ose me burgim deri në dy vjet.

Neni 20

Pengimi i stërvitjeve dhe detyrave në fushën e mbrojtjes civile

(Ndryshuar togfjalësh në paragrafin e dytë me ligjin nr. 8919, datë 4.7.2002)

Pengimi që u bëhet komandave, trupave e mjeteve ushtarake, në stërvitje, kushtim e operacione të tjera, përbën kundërvajtje penale dhe dënohet me gjobë ose me burgim deri në dy vjet.

Po kjo vepër, e kryer gjendje lufte ose gjendje të jashtëzakonshme, dënohet me burgim deri në pesë vjet.

Neni 21

Pengimet në furnizimet e forcave të armatosura

(Ndryshuar togfjalësh në paragrafin e dytë me ligjin nr. 8919, datë 4.7.2002)

Mosrealizimi me dashje i detyrimeve kontraktore gjatë kohës kur trupat ndodhen në stërvitje ose operacione ushtarake, dënohet me gjobë ose me burgim deri në tre vjet.

Po kjo vepër, e kryer në gjendje lufte ose gjendje të jashtëzakonshme, dënohet me burgim nga tre deri në dhjetë vjet.

Neni 22

Shmangia nga detyrimet e mbrojtjes civile

(Ndryshuar togfjalësh me ligjin nr. 8919, datë 4.7.2002)

Moskryerja në gjendje lufte ose gjendje të jashtëzakonshme e detyrimeve për mbrojtjen civile të vendit, përbën kundërvajtje penale dhe dënohet me gjobë ose me burgim deri në dy vjet.

Neni 23

Shkelja e rregullave të sjelljes shoqërore në gjendje lufte

(Ndryshuar togfjalësh në titull dhe në paragraf me ligjin nr. 8919, datë 4.7.2002)

Shkelja e rregullave të ndriçimit ose të rregullave të tjera të detyrueshme në gjendje lufte, kur kryhet më shumë se një herë ose ka sjellë pasoja të rënda, dënohet me burgim deri në tre vjet.

Neni 24

Përhapja në gjendje lufte e informatave që ngjallin panik

(Ndryshuar togfjalësh në titull dhe në paragrafin e parë me ligjin nr. 8919, datë 4.7.2002)

Përhapja e informatave të rreme që ngjallin panik, e kryer në gjendje lufte, dënohet me burgim deri në pesë vjet.

Kur kjo vepër ka shkaktuar pasoja të rënda, dënohet me burgim jo më pak se pesë vjet.

KREU II

KRIME USHTARAKE KUNDËR SIGURIMIT KOMBËTAR

Neni 25

Dorëzimi i forcave ushtarake dhe i mjeteve të luftimit armikut

(Ndryshuar me ligjin nr. 8919, datë 4.7.2002)

Dorëzimi tek armiku, nga kuadri komandues, pa ndonjë domosdoshmëri ushtarake, i forcave ushtarake, mjeteve, armatimit, municionit ose teknikës, që i janë besuar, dënohet me burgim nga pesë vjet deri në njëzet e pesë vjet.

Kur nga kjo vepër janë shkaktuar pasoja të rënda në njerëz ose në teknikë, dënohet me burgim jo më pak se pesëmbëdhjetë vjet.

Po kjo vepër e kryer në gjendje lufte ose në gjendje të jashtëzakonshme, dënohet me burgim jo më pak se njëzet vjet, me burgim të përjetshëm ose me vdekje.

Neni 26

Dhënia e informatave sekrete

(Ndryshuar togfjalësba në paragrafin e parë dhe të dytë, shtuar paragrafi i tretë me ligjin nr. 8919, datë 4.7.2002)

Ushtaraku që i jep armikut të gjithë ose një pjesë të situatës së forcave të armatosura, planin e një operacioni, lëvizjet, fushimet, pozicionet, sinjalet e çdo lloji, gjendjen e furnizimit a të municionit, vendfurnizimet, karburantet, ushqimet ose paratë apo i lë në dorë dokumente ose të dhëna të tjera me karakter sekret, dënohet me burgim nga tre deri në dhjetë vjet.

Po kjo vepër e kryer për operacione ose mjete e teknikë të rëndësishme luftarake, si dhe kur nga dhënia e informatave janë shkaktuar pasoja të rënda, dënohet me burgim nga dhjetë deri në njëzet vjet.

Po kjo vepër e kryer në gjendje lufte ose në gjendje të jashtëzakonshme, dënohet me burgim jo më pak se njëzet vjet ose me burgim të përjetshëm ose me vdekje.

Neni 27

Zhdukja e akteve që lidhen me sigurimin kombëtar.

Ushtaraku, që për të dëmtuar sigurimin kombëtar zhduk, shkatërron, falsifikon, rrëmben apo fut në dorë dokumente ose akte të karakterit sekret shtetror, dënohet me burgim jo më pak se dhjetë vjet.

Neni 28

Dhënia e ndihmës armikut

Ushtaraku që në kushtet e luftës ose gjendjes së jashtëzakonshme ndihmon armikun me armë, municion, mjete e pajisje të tjera, me para ose çdo gjë tjetër ose strehon apo mbron armikun, dënohet me burgim jo më pak se pesë vjet ose burgim të përjetshëm a vdekje.

Neni 29

Veprime të ulta para armikut

Ushtaraku që në prezencë apo përpara momentit të shfaqjes së armikut;

1. largohet;
 2. dorëzon pozicionin, materialet ushtarake;
 3. për shkak të mos zbatimit të rregullave apo mosbindjes rrezikon sigurinë e postit, vendit e materialeve ushtarake;
 4. flak armën apo municionin;
 5. është fajtor për manovrimet të ngathta;
 6. braktis vendin e caktuar;
 7. shkakton alarme fallso në njësinë apo vendin që është nën kontrollin e forcave të armatosura;
 8. me qëllim nuk kryen veprimet e mundshme për të kapur, shkatërruar, çarmatosur trupat armike;
 9. nuk u jep ndihmën e duhur forcave tona apo aleatëve tanë;
 10. nuk bën të gjitha përpjekjet e duhura për të fshehur apo asgjësuar të gjithë dokumentacionin me karakter sekret kur kapet nga armiku,
- dënohet me burgim jo më pak se dhjetë vjet.

Neni 30

Shpërdorimi i mandatit

(Ndryshuar fjalë me ligjin nr. 8919, datë 4.7.2002)

Cilido që caktohet nga Shteti Shqiptar të diskutojë me shtete e fuqi të huaja probleme shtetërore dhe nuk i qëndron besnik mandatit, duke i shkaktuar pasoja interesave kombëtare, dënohet me burgim jo më pak se pesë vjet.

Neni 31

Ndihma spiunëve

(Ndryshuar togfjalësh në paragrafin e tretë me ligjin nr. 8919, datë 4.7.2002)

Ushtaraku që jep apo gjen strehim ose ndihmon në forma të ndryshme një spiun apo agjent të armikut, dënohet me burgim deri në pesë vjet.

Ushtaraku që i jep informacione me karakter sekret, spiunëve, dënohet me burgim jo më pak se pesë vjet.

Po kjo vepër e kryer në gjendje lufte ose gjendje të jashtëzakonshme dënohet me burgim jo më pak se dhjetë vjet.

Neni 32

Rebelimi

(Ndryshuar togfjalësh në paragrafin e tretë, fjalë në paragrafin e parë me ligjin nr. 8919, datë 4.7.2002)

Cilido që kërkon të uzurpojë ose të mospërfillë autoritetin, të protestojë në bashkëpunim dhe me pjesëtarë të tjerë të Forcave të Armatosura, të mos u bindet urdhrave me qëllim që të mos respektohet Kushtetuta, ligji dhe rregulli në Forcat e Armatosura, të krijojë me të tjerë revolta e dhunë apo çdo formë tjetër çrregullimi, dënohet me burgim jo më pak se pesë vjet.

Ushtaraku që nuk vepron për të ndaluar apo shtypur rebelimin që kryhet apo është në përgatitje për t'u kryer, dënohet me burgim jo më pak se pesë vjet.

Veprat e sipërme të kryera në gjendje lufte ose gjendje të jashtëzakonshme dënohen me burgim jo më pak se dhjetë vjet.

KREU III

SHMANGIA NGA SHËRBIMI USHTARAK

Neni 33

Dezertimi

(Hequr dhe shtuar togfjalësh në paragrafin e parë, ndryshuar togfjalësh në paragrafin e dytë me ligjin nr. 8919, datë 4.7.2002)

Largimi nga reparti ose vendi i shërbimit, i ushtarakëve aktivë, me qëllim shmangie përgjithmonë nga shërbimi ushtarak, si dhe mosparaqitja e tyre me të njëjtin qëllim në repartin ose vendin e shërbimit me rastin e emërimit, transferimit, kthimit nga misioni, nga spitali ose nga leja, dënohet me burgim deri në pesë vjet.

Po kjo vepër e kryer në gjendje lufte ose në gjendje të jashtëzakonshme dënohet me burgim nga pesë deri në pesëmbëdhjetë vjet dhe, kur ka sjellë pasoja të rënda, me burgim jo më pak se dhjetë vjet.

Neni 34

Dezertimi i kuadrit komandues

(Hequr togfjalësh në paragrafin e parë, ndryshuar togfjalësh në paragrafin e dytë me ligjin nr. 8919, datë 4.7.2002)

4.7.2002)

Dezertimi i personave të kuadrit komandues, dënohet me burgim deri në dhjetë vjet.

Po kjo vepër e kryer në gjendje lufte ose në gjendje të jashtëzakonshme dënohet me burgim jo më pak se pesë vjet dhe, kur ka sjellë pasoja të rënda, jo më pak se pesëmbëdhjetë vjet, me burgim të përjetshëm a me vdekje.

Neni 35

Largimi pa leje

(Ndryshuar fjalë në paragrafin e parë, të dytë, ndryshuar togfjalësh në paragrafin e tretë me ligjin nr. 8919, datë 4.7.2002)

Largimi pa leje i ushtarakut nga reparti ose vëndi i shërbimit për një kohë për më shumë se pesë ditë ose më shumë se një herë, për një kohë më tepër se njëzetekatër orë, përbën kundërvajtje penale dhe dënohet me ulje në gradë, me gjobë ose me burgim deri në një vit.

Po kjo vepër e kryer nga oficerët dhe nënoficerët e shërbimit aktiv për një kohë për më shumë se shtatë ditë ose më shumë se një herë, për një kohë më tepër se njëzetekatër orë, përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Kur këto vepra kryhen në gjendje lufte ose në gjendje të jashtëzakonshme dënohen me burgim nga dy deri në dhjetë vjet.

Neni 36

Mosparaqitja në repart ose në vëndin e shërbimit

(Shtuar fjalë në paragrafin e parë, ndryshuar togfjalësh në paragrafin e dytë me ligjin nr. 8919, datë 4.7.2002)

Mosparaqitja e ushtarëve aktivë dhe nënoficerëve të shërbimit të detyruar ushtarak pa shkaqe të arsyeshme në repart ose në vëndin e shërbimit me rastin e emërimit, transferimit, kthimit nga misioni, nga spitali ose leja, për një kohë më tepër se pesë ditë ose më shumë se një herë për një kohë më tepër se njëzetekatër orë, përbën kundërvajtje penale dhe dënohet me gjobë ose me burgim deri në një vit.

Po kjo vepër e kryer në gjendje lufte apo në gjendje të jashtëzakonshme dënohet me burgim nga dy deri në dhjetë vjet.

Neni 37

Mosparaqitja e oficerëve dhe nënoficerëve aktivë

(Ndryshuar fjalë në paragrafin e parë, ndryshuar togfjalësh në paragrafin e dytë me ligjin nr. 8919, datë 4.7.2002)

Mosparaqitja e oficerëve dhe nënoficerëve të shërbimit aktiv në repart ose në vëndin e shërbimit pa shkaqe të arsyeshme me rastin e emërimit, transferimit, kthimit nga misioni ose detyra, nga spitali ose nga leja për një kohë për më tepër se shtatë ditë ose më shumë se një herë për një kohë më tepër se njëzetekatër orë, përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Po kjo vepër e kryer në gjendje lufte ose gjendje të jashtëzakonshme dënohet me burgim nga dy deri në dhjetë vjet.

Neni 38

Largimi pa leje i të thirrurve për stërvitje

(Shtuar togfjalësh dhe ndryshuar fjalë në paragrafin e parë, ndryshuar togfjalësh në paragrafin e dytë me

ligjin nr. 8919, datë 4.7.2002)

Largimi pa leje nga reparti i ushtarakëve të thirrur në stërvitje ushtarake, prova gatishmërie ose mobilizimi më shumë se një herë, përbën kundërvajtje penale dhe dënohet me ulje në gradë ose me gjobë.

Po kjo vepër e kryer me përsëritje, në gjendje lufte ose gjendje të jashtëzakonshme, dënohet me burgim deri në tre vjet.

Neni 39

Mosparaqitja e të thirrurve në stërvitje

(Ndryshuar fjalë në paragrafin e parë, ndryshuar togfjalësh në paragrafin e dytë me ligjin nr. 8919, datë 4.7.2002)

Mosparaqitja e ushtarakëve të thirrur në stërvitje në kohën e caktuar në repart ose në vendin e shërbimit pa shkaqe të arsyeshme, përbën kundërvajtje penale dhe dënohet me ulje në gradë ose gjobë.

Po kjo vepër e kryer me përsëritje, në gjendje lufte ose në gjendje të jashtëzakonshme, dënohet me burgim deri në tre vjet.

Neni 40

Shmangia të tjera nga shërbimi ushtarak

(Ndryshuar togfjalësh në paragrafin e dytë dhe të katërt me ligjin nr. 8919, datë 4.7.2002)

Shmangia nga shërbimi ushtarak ose nga kryerja e detyrave të caktuara të shërbimit ushtarak, duke u shtirë i sëmurë, duke dëmtuar shëndetin, duke falsifikuar dokumente ose me ndonjë mënyrë tjetër të ngjashme, kur shmangia ka zgjatur deri në një muaj, dënohet me burgim deri në dy vjet.

Po këto vepra të kryera në gjendje lufte ose gjendje të jashtëzakonshme, kur shmangia ka zgjatur deri në një muaj, dënohen me burgim nga dy deri në shtatë vjet.

Shmangia me mënyrat e mësipërme, kur ka zgjatur mbi një muaj, dënohet me burgim nga dy deri në pesë vjet.

Këto vepra të kryera në gjendje lufte ose gjendje të jashtëzakonshme, kur shmangia zgjat mbi një muaj, dënohen me burgim jo më pak se pesë vjet.

Neni 41

Shkelja e rregullave të shërbimit të rojes

(Ndryshuar paragrafi i parë, togfjalësh në paragrafin e dytë me ligjin nr. 8919, datë 4.7.2002)

Fjetja në shërbim, largimi nga vendi i shërbimit, përdorimi i pijeve alkoolike ose drogës gjatë shërbimit, shkelja e rregullave të sigurimit teknik të armëve në përdorim ose shkelja e urdhrave ose instruksioneve të veçanta që lidhen me objektin në ruajtje ose me natyrën e shërbimit, përbëjnë kundërvajtje penale dhe dënohen me ulje në gradë, nxjerrje në lirim ose burgim deri në dy vjet.

Shkelja e rregullave të shërbimit të rojes kur kanë sjellë pasoja të rënda dënohet me burgim nga dy deri në tetë vjet.

Shkeljet e rregullave të shërbimit të rojes të kryera në gjendje lufte ose gjendje të jashtëzakonshme dënohet me burgim nga tre deri në dhjetë vjet dhe, kur ka sjellë pasoja të rënda, jo më pak se dhjetë vjet.

Neni 42

Shkelja e rregullave të shërbimit të rojes në objekte të rëndësishme

(Ndryshuar togfjalësh në paragrafin e tretë me ligjin nr. 8919, datë 4.7.2002)

Shkelja e rregullave të shërbimit të rojes, pranë depove të armëve, të municioneve e lëndëve plasëse ose në objekte që kanë rëndësi veçanërisht të madhe shtetërore ose ushtarake, të njohura si të tilla në akte të veçanta, dënohen me nxjerrje në lirim ose burgim deri në tre vjet.

Kur nga kjo vepër kanë ardhur pasoja të rënda dënohet me burgim nga një deri në pesë vjet.

Po kjo vepër e kryer në gjendje lufte ose gjendje të jashtëzakonshme dënohet me burgim nga tre deri në dhjetë vjet dhe, kur ka sjellë pasoja të rënda, jo më pak se dhjetë vjet.

Neni 43

Shkelja e rregullave të shërbimit të rojes në kufi

(Ndryshuar togfjalësh në paragrafin e tretë me ligjin nr. 8919, datë 4.7.2002)

Shkelja e rregullave të shërbimit të rojes në kufi dënohet me burgim deri në dy vjet.

Kur nga këto vepra kanë ardhur pasoja të rënda dënohet me burgim nga dy deri në tetë vjet.

Po kjo vepër e kryer në gjendje lufte ose në gjendje të jashtëzakonshme dënohet me burgim nga pesë deri në pesëmbëdhjetë vjet dhe, kur ka sjellë pasoja të rënda, me burgim jo më pak se dhjetë vjet.

Neni 44

Shkelja e rregullave të shoqërimit

(Ndryshuar fjalë në paragrafin e parë, togfjalësh në paragrafin e tretë me ligjin nr. 8919, datë 4.7.2002)

Shkelja e rregullave të shoqërimit nga cilido i ngarkuar me këtë detyrë përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Kur nga kjo vepër kanë ardhur pasoja të rënda dënohet me burgim nga dy deri në tetë vjet.

Po kjo vepër e kryer në gjendje lufte ose gjendje të jashtëzakonshme dënohet me burgim nga tre deri në dhjetë vjet dhe, kur kanë ardhur pasoja të rënda, jo më pak se dhjetë vjet.

Neni 45

Moscaktimi i rojeve

(Shtuar fjalë në paragrafin e parë dhe paragrafi i dytë, ndryshuar fjalë në paragrafin e parë, togfjalësh në paragrafin e tretë me ligjin nr. 8919, datë 4.7.2002)

Moscaktimi ose mosnxjerrja e rojeve ose personave për shërbim ose shoqërim, pa shkaqe të arsyeshme përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në një vit.

Kur nga kjo vepër kanë ardhur pasoja të rënda, dënohet me burgim nga dy deri në tetë vjet.

Po kjo vepër e kryer në gjendje lufte ose gjendje të jashtëzakonshme dënohet me burgim deri në dhjetë vjet dhe, kur ka sjellë pasoja veçanërisht të rënda, me burgim nga pesë deri në pesëmbëdhjetë vjet.

Neni 46

Moszbatimi i urdhrit

(Shtuar dhe ndryshuar fjalë në paragrafin e parë, ndryshuar togfjalësh në paragrafin e tretë me ligjin nr. 8919, datë 4.7.2002)

Mos bindja ose moszbatimi i urdhrave nga cilido që është i detyruar t'i zbatojë e respektojë ato, përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Po kjo vepër e kryer në gjendje lufte apo në gjendje të jashtëzakonshme dënohet me burgim deri në dhjetë vjet.

Neni 47

Moszbatimi i urdhrit nga kuadri komandues.

(Ndryshuar togfjalësh në paragrafin e tretë me ligjin nr. 8919, datë 4.7.2002)

Moszbatimi i urdhrit i kryer prej një personi të kuadrit komandues dënohet me nxjerrje në lirim ose me burgim deri në tre vjet.

Kur nga kjo vepër janë shkaktuar pasoja të rënda dënohet me burgim nga dy deri në tetë vjet.

Po kjo vepër, e kryer në gjendje lufte ose gjendje të jashtëzakonshme, dënohet me burgim jo më pak se dhjetë vjet dhe, kur ka sjellë pasoja të rënda, dënohet me burgim jo më pak se pesëmbëdhjetë vjet, me burgim të përjetshëm a me vdekje.

Neni 48

Lëvizja e trupave pa të drejtë

(Ndryshuar fjalë me ligjin nr. 8919, datë 4.7.2002)

Komandanti që pa autorizim, urdhër, mision të veçantë ose shkak tjetër të ligjshëm urdhëron lëvizjen e trupave ose mjeteve tokësore, detare apo ajrore, kryen kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Neni 49

Ulja e dinjitetit ushtarak

(Hequr fjalë dhe shtuar togfjalësh, ndryshuar fjalë me ligjin nr. 8919, datë 4.7.2002)

Kryerja e veprimeve që ulin dinjitetin e forcave të armatosura, ose institucioneve të tjera ku bëjnë pjesë, si në shërbim ashtu dhe jashtë shërbimit, përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

KREU IV

VEPRA PENALE KUNDËR AUTORITETIT USHTARAK

Neni 50

Shtrëngimi për të shkelur detyrat

(Ndryshuar paragrafi i parë, togfjalësh në paragrafin e tretë me ligjin nr. 8919, datë 4.7.2002)

Kundërshtimi që i bëhet cilitdo personi të personelit të shërbimit, kur është duke kryer detyrat e shërbimit ushtarak ose shërbime të tjera, si dhe shtrëngimi i tij për t'i shkelur ato, dënohen me burgim deri në pesë vjet.

Kur kjo vepër është kryer me dhunë apo ka sjellë pasoja të rënda dënohet me burgim nga tre deri në dhjetë vjet.

Po kjo vepër e kryer në gjendje lufte apo në gjendje të jashtëzakonshme dënohet me burgim jo më pak se pesë vjet dhe, kur ka sjellë pasoja të rënda, me burgim jo më pak se dhjetë vjet, me burgim të përjetshëm a me vdekje.

Neni 51

Goditja ose kundërshtimi i eprorit

(Ndryshuar paragrafi i parë, togfjalësh në paragrafin e tretë, shtuar paragrafi i dytë me ligjin nr. 8919, datë 4.7.2002)

Kundërshtimi i eprorit të tij oficer, gjatë kohës që është në detyrë ose për shkak të saj, ose sjelljet ndaj tij me përbuzje ose pa respekt, me fjalë ose veprime, dënohen me nxjerrje në lirim ose me burgim deri në tre vjet.

Po kjo vepër e kryer në bashkëpunim, me dhunë fizike ose më shumë se një herë, dënohet me burgim nga dy deri në shtatë vjet.

Po kjo vepër e kryer në gjendje lufte apo gjendje të jashtëzakonshme dënohet me burgim nga tre deri në dhjetë vjet.

Neni 52

Goditja ose kundërshtimi i nënoficerit

(Ndryshuar me ligjin nr. 8919, datë 4.7.2002)

Kundërshtimi i eprorit të tij nënoficer, gjatë kohës që është në detyrë ose për shkak të saj, ose sjelljet ndaj tij me përbuzje ose pa respekt, me fjalë ose veprime, përbëjnë kundërvajtje penale dhe dënohen me ulje në gradë, me gjobë, nxjerrje në lirim ose me burgim deri në një vit.

Po kjo vepër e kryer në bashkëpunim, me dhunë fizike ose më shumë se një herë, dënohet me burgim deri në pesë vjet.

Neni 53

Kundërshtimi i policisë ushtarake

(Ndryshuar fjalë në paragrafin e parë dhe paragrafi i dytë me ligjin nr. 8919, datë 4.7.2002)

Kundërshtimi që i bëhet punonjësit të policisë ushtarake për ta penguar në kryerjen e detyrës së tij sipas ligjit, përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në një vit.

Po kjo vepër e kryer në bashkëpunim, me dhunë fizike ose më shumë se një herë, dënohet me burgim nga dy deri në shtatë vjet.

Neni 54

Mosrespekti ndaj oficerit epror

(Ndryshuar fjalë me ligjin nr. 8919, datë 4.7.2002)

Cilido që sillet pa respekt, me fjalë a veprime kundrejt cilitdo oficer epror, kryen kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në gjashtë muaj.

KREU V

VJEDHJE, SHPËRDORIME, FALSIFIKIME

Neni 55

Vjedhje armatimi

(Ndryshuar fjalë në paragrafin e parë, togfjalësh në paragrafin e dytë me ligjin nr. 8919, datë 4.7.2002)

Cilido që vjedh armatim luftarak, dënohet me burgim jo më pak se tre vjet.

Po kjo vepër e kryer në gjendje lufte ose gjendje të jashtëzakonshme, dënohet me burgim jo më pak se dhjetë vjet.

Neni 56

Vjedhje e pjesëve të armatimit

(Ndryshuar fjalë në paragrafin e parë me ligjin nr. 8919, datë 4.7.2002)

Cilido që vjedh pjesë të veçanta të armatimit ose të teknikës luftarake, dënohet me burgim deri në dy vjet.

Po kjo vepër, kur ka cenuar gatishmërinë e armatimit luftarak, dënohet me burgim nga dy deri në pesë vjet.

Neni 57

Vjedhja e municionit

(Ndryshuar fjalë në paragrafin e parë, togfjalësh në paragrafin e dytë me ligjin nr. 8919, datë 4.7.2002)

Cilido, që vjedh municion luftarak, dënohet me burgim deri në dhjetë vjet.

Po kjo vepër e kryer në gjendje lufte ose gjendje të jashtëzakonshme dënohet me burgim jo më pak se dhjetë vjet.

Neni 58

Shitja e armatimit ose e pajisjeve ushtarake

(Ndryshuar fjalë me ligjin nr. 8919, datë 4.7.2002)

Cilido që shet armatimin, municionin, mjetet dhe pajisjet e tjera të dhëna në përdorim vetjak, dënohet me gjobë, nxjerrje në lirim ose me burgim deri në pesë vjet.

Neni 59

Vjedhja

(Ndryshuar me ligjin nr. 8919, datë 4.7.2002)

Vjedhja e pasurisë në repart ose në vendin e shërbimit dënohet me burgim deri në dhjetë vjet.

Vjedhja e pasurisë, si armatim, municion, mjete materiale e pajisje ose e sendeve të tjera, të shoqëruara me dhunë ose me përdorim arme, dënohet me burgim nga shtatë deri në njëzet vjet.

Po këto vepra, kur kanë sjellë pasojë dëmtime të rënda të shëndetit ose vdekjen, dënohen me burgim jo më pak se pesëmbëdhjetë vjet ose me burgim të përjetshëm.

Neni 60

Vjedhje në fushën e betejës

Vjedhja e sendeve që gjenden te të vrarët e të plagosurit në fushën e betejës, si dhe plaçkitja e robërve të luftës, dënohet me burgim nga tre deri në dhjetë vjet. Kur ka rrethana rënduese, me burgim jo më pak se pesë vjet.

Neni 61

Vjedhja e plaçkës së luftës

Ushtaraku që nuk siguron të gjithë plaçkën e luftës që i është marrë armikut, që nuk lajmëron komandën, e vjedh ose e shpërdoron atë dhe nuk dorëzon në autoritet përkatëse të gjithë materialet e kapura a të braktisura ose që ndodhen në ruajtje apo nën kontroll, dënohet me burgim deri në dhjetë vjet.

Neni 62

Shpërdorimi, shkatërrimi ose dëmtimi i pasurisë ushtarake

(Ndryshuar togfjalësh në paragrafin e dytë me ligjin nr. 8919, datë 4.7.2002)

Shpërdorimi, shkatërrimi ose dëmtimi me dashje i armatimeve, i mjeteve të komunikacionit ose të ndërlidhjes dhe të teknikës luftarake, të dhëna në përdorim ose në ruajtje, dënohen me burgim deri në dhjetë vjet.

Po këto vepra të kryera me zjarr a me mjet tjetër të rrezikut të përbashkët ose kur kanë shkaktuar vdekje ose pasoja të tjera të rënda ose në gjendje lufte a gjendje të jashtëzakonshme, dënohen me burgim jo më pak se pesë vjet.

Neni 63

Shkatërrimi i pasurisë ushtarake nga pakujdesia

(Shtuar fjalë në paragrafin e parë, ndryshuar togfjalësh në paragrafin e dytë me ligjin nr. 8919, datë 4.7.2002)

Shkatërrimi ose dëmtimi nga pakujdesia i armatimeve, i teknikës luftarake ose i mjeteve të komunikacionit dhe të ndërlidhjes, të dhëna në ruajtje ose në përdorim, dënohet me gjobë, me nxjerrje në lirim ose me burgim deri në pesë vjet.

Po këto vepra, kur kanë shkaktuar vdekje ose pasoja të tjera të rënda ose janë kryer në gjendje lufte a gjendje të jashtëzakonshme, dënohen me burgim deri pesëmbëdhjetë vjet.

Neni 64

Shkatërrimi i mjeteve të luftimit

Shkatërrimi ose vënia jashtë përdorimit nga ana e kuadrit komandues, në kundërshtim me rregullat ushtarake, e fortifikatave, e anijeve, tankeve, aeroplanëve, depove ushtarake e mjeteve të tjera të luftimit që janë besuar, mosmarra e masave të duhura për shkatërrimin ose vënien jashtë përdorimit të mjeteve të mësipërme të luftimit, kur ato rrezikohen të bien menjëherë në duart e armikut dhe, kur nuk janë përdorur të gjitha mundësitë dhe mënyrat për shpëtimin e tyre, dënohen me burgim nga pesë deri në pesëmbëdhjetë vjet dhe, kur janë shkaktuar pasoja të rënda, me burgim jo më pak se pesëmbëdhjetë vjet.

Neni 65

Falsifikimi i dokumenteve të luftimit

(Ndryshuar me ligjin nr. 8919, datë 4.7.2002)

Falsifikimi i dokumenteve të luftimit dënohet me burgim deri në dhjetë vjet.

Po kjo vepër e kryer në gjendje lufte ose në gjendje të jashtëzakonshme, dënohet me burgim nga dhjetë deri në njëzet vjet.

Neni 66

Riprodhimi i palejuar i dokumenteve

(Ndryshuar fjalë me ligjin nr. 8919, datë 4.7.2002)

Personi që pa pasur për detyrë, bën fotografi, skica, vizatime në objekte të rëndësishme ushtarake ose riprodhon dokumente sekrete pa leje, kryen kundravajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Neni 67

Humbja e dokumentave

(Ndryshuar fjalë në paragrafin e parë, togfjalësh në paragrafin e dytë me ligjin nr. 8919, datë 4.7.2002)

Cilido që humb ose nga pakujdesia dëmton dokumente zyrtare që i janë besuar për shkak të detyrës e që kanë të bëjnë me armatimet, materialet ushtarake, plane operationale, vendosjen e reparteve, fortifikimet, teknikën, dënohen me gjobë, nxjerrje në lirim ose me burgim deri në tre

vjet.

Po këto vepra të kryera në gjendje lufte ose gjendje të jashtëzakonshme dënohen me burgim nga tre deri në dhjetë vjet.

Neni 68

Shkelja e rregullave në administrimin e sekretit

(Ndryshuar fjalë në paragrafin e parë, ndryshuar togfjalësh në paragrafin e dytë dhe të katërt me ligjin nr. 8919, datë 4.7.2002)

Cilido i ngarkuar të mbajë nën ruajtje ose administrim sekretin shtetëror apo ushtarak dhe, nga pakujdesia në zbatimin e rregullave, mundëson apo lehtëson kryerjen e veprimeve në dëm të ruajtjes së sekretit, dënohet me ulje në gradë, me gjobë, me nxjerrje në lirim ose me burgim deri në dy vjet.

Po kjo vepër e kryer në gjendje lufte ose gjendje të jashtëzakonshme dënohet me burgim nga një deri në pesë vjet.

Shkelja me dashje e rregullave për administrimin ose ruajtjen e sekretit, kur këto vepra mundësojnë ose lehtësojnë kryerjen e veprimeve në dëm të ruajtjes së sekretit, dënohen me burgim nga një deri në pesë vjet.

Kur kjo vepër është kryer në gjendje lufte ose gjendje të jashtëzakonshme dënohet me burgim jo më pak se pesë vjet.

Neni 69

Vjedhja e dokumenteve sekrete

Vjedhja ose futja në dorë në forma të tjera e dokumenteve që përbëjnë sekret ushtarak me qëllim përfitimi dënohet me burgim deri në pesë vjet.

Neni 70

Shpërdorimi i detyrës

(Ndryshuar me ligjin nr. 8919, datë 4.7.2002)

Kryerja ose moskryerja me dashje e veprimeve ose e mosveprimeve në kundërshtim me ligjin, për përmbushjen e rregullt të detyrës, kur i ka sjellë pasoja të rënda shtetit ose interesave të ligjshëm të shtetasve, dënohet me gjobë, nxjerrje në lirim ose me burgim deri në pesë vjet.

Kur kjo vepër është kryer nga kuadri ose personeli komandues dënohet me burgim nga tre deri në tetë vjet.

Po kjo vepër e kryer në gjendje lufte ose në gjendje të jashtëzakonshme, dënohet me burgim nga pesë deri në pesëmbëdhjetë vjet.

Neni 71

Keqtrajtimi

(Ndryshuar fjalë me ligjin nr. 8919, datë 4.7.2002)

Cilido që sillet me arrogancë apo keqtrajton vartësit e tij kryen kundërvajtje penale dhe dënohet me ulje në gradë me gjobë ose me burgim deri në dy vjet.

Neni 72

Pranimi i favoreve nga ushtaraku

(Ndryshuar fjalë me ligjin nr. 8919, datë 4.7.2002)

Cilido që pa autorizim pranon funksione, nderime, pensione, vlerësime të kësaj natyre nga një shtet i huaj ose që mban botërisht uniforma, shënja dalluese të gradës ushtarake ose dekorata

kombëtare të vendit apo të huaj që nuk i takojnë, kryen kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Neni 73

Shkelja e barazisë së shtetasve

Kur ushtaraku gjatë kryerjes së detyrës shtetërore bën dallime mbi baza origjine, seksi, gjendjeje shëndetësore, bindjeje fetare, politike, të përkatësisë së një etnie, kombësie, race apo feje të caktuar, që shprehen në krijimin e privilegjeve të padrejta ose në refuzimin e një të drejte ose përfitimi që buron nga ligji, dënohet me gjobë, nxjerrje në lirim ose me burgim deri në pesë vjet.

Neni 74

Kryerja e funksioneve pas dhënies fund të tyre

(Ndryshuar fjalë në paragrafin e parë, togfjalësh në paragrafin e dytë me ligjin nr. 8919, datë 4.7.2002)

Cilido që pa urdhër, autorizim apo shkak të ligjshëm, merr përsipër një komandë, drejtim, shërbim ose ai që, megjithëse i është komunikuar urdhri që është hequr, që e ndalon ose e pezullon nga detyra komanduese ose drejtuese, vazhdon ta kryejë atë, dënohet me gjobë, nxjerrje në lirim ose me burgim deri në tre vjet.

Po kjo vepër e kryer në gjendje lufte ose gjendje të jashtëzakonshme dënohet me burgim nga tre deri në dhjetë vjet.

Neni 75

Përdorimi i vartësve për shërbime vetjake

(Shtuar dhe ndryshuar fjalë me ligjin nr. 8919, datë 4.7.2002)

Përdorimi i paligjshëm nga eprori i vartësit për shërbime vetjake të tij, të familjes ose në favor të personave të tjerë, përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Neni 76

Shmangia nga detyra

(Ndryshuar fjalë në paragrafin e parë dhe togfjalësh në paragrafin e dytë me ligjin nr. 8919, datë 4.7.2002)

Cilido që është i ngarkuar me zbatimin e një detyre ose misioni dhe pa shkak të ligjshëm shmanget nga instruksionet e marra, duke dëmtuar përfundimin, kryen kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Po kjo vepër e kryer në gjendje lufte ose gjendje të jashtëzakonshme dënohet me burgim nga tre deri në dhjetë vjet.

KREU VI

KRIME KUNDËR JETËS DHE SHËNDETTT TË USHTARAKUT

Neni 77

Vrasja me dashje

(Shfuqizuar me vendimin e Gjykatës Kushtetuese nr. 65, datë 10.12.1999; ndryshuar me ligjin nr. 8919, datë 4.7.2002)

Vrasja me dashje e kryer nga eprori ndaj vartësit, nga vartësi ndaj eprorit ose ndërmjet tyre, për motive që lidhen me detyrën, dënohet me burgim jo më pak se pesëmbëdhjetë vjet ose me

burgim të përjetshëm.

Po kjo vepër e kryer në gjendje lufte ose në gjendje të jashtëzakonshme, dënohet me burgim të përjetshëm ose me vdekje.

Neni 78

Vrasja nga pakujdesia

Shkelja e rregulloreve ushtarake që kanë sjellë si pasojë vdekjen e një personi nga pakujdesia dënohet me burgim nga dy deri në tetë vjet.

Neni 79

Plagosja e rëndë me dashje

(Ndryshuar me ligjin nr. 8919, datë 4.7.2002)

Plagosja e rëndë me dashje e kryer nga eprori ndaj vartësit ose e vartësit ndaj eprorit ose ndërmjet tyre, për motive që lidhen me detyrën, dënohet me burgim nga tre deri në dhjetë vjet.

Po kjo vepër, kur është kryer më shumë se një herë, kundër disa personave ose kur ka sjellë si pasojë vdekjen, dënohet me burgim nga pesë deri në pesëmbëdhjetë vjet.

Po kjo vepër e kryer në gjendje lufte ose në gjendje të jashtëzakonshme dënohet me burgim nga dhjetë deri në njëzet vjet.

Neni 80

Plagosja e rëndë nga pakujdesia

(Ndryshuar fjalë me ligjin nr. 8919, datë 4.7.2002)

Shkelja e rregulloreve ushtarake që kanë sjellë si pasojë plagosjen e rëndë nga pakujdesia të një ose më shumë personave përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në dy vjet.

Neni 81

Plagosja e lehtë me dashje

(Ndryshuar me ligjin nr. 8919, datë 4.7.2002)

Plagosja e lehtë me dashje e kryer nga eprori ndaj vartësit ose e vartësit ndaj eprorit ose ndërmjet tyre, për motive që lidhen me detyrën, përbën kundërvajtje penale dhe dënohet me ulje në gradë, me gjobë, me nxjerrje në lirim ose me burgim deri në dy vjet.

Po kjo vepër, kur është kryer më shumë se një herë ose kundër dy ose më shumë personave, dënohet me burgim nga një deri në tre vjet.

Po kjo vepër e kryer në gjendje lufte ose në gjendje të jashtëzakonshme dënohet me burgim nga dy deri në pesë vjet.

Neni 82

Plagosja nga pakujdesia

(Ndryshuar fjalë me ligjin nr. 8919, datë 4.7.2002)

Shkelja e rregulloreve ushtarake që ka sjellë si pasojë plagosjen e lehtë nga pakujdesia të një ose më shumë personave përbën kundërvajtje penale dhe dënohet me ulje në gradë, me gjobë, nxjerrje në lirim ose me burgim deri në gjashtë muaj.

Neni 82/a

Kanosja

(Shtuar me ligjin nr. 8919, datë 4.7.2002)

Kanosja serioze për vrasje ose për plagosje të rëndë e kryer nga eprori ndaj vartësit, nga vartësi ndaj eprorit ose ndërmjet tyre, për motive që lidhen me detyrën, dënohet me gjobë ose me burgim deri në dy vjet.

Po kjo vepër e kryer në kohë lufte ose në gjendje të jashtëzakonshme dënohet me burgim nga dy deri në pesë vjet.

Neni 82/b

Shkaktimi i vetëvrasjes

(Shtuar me ligjin nr. 8919, datë 4.7.2002)

Shkaktimi i vetëvrasjes ose i tentativës së vetëvrasjes të vartësit, si rrjedhojë e trajtimit ose e sjelljes së keqe sistematike nga eprorët, kuadri ose personeli komandues, dënohet me burgim nga dy deri në pesë vjet.”

KREU VII

VEPRA PENALE KUNDËR RENDIT DHE SIGURISË PUBLIKE

Neni 83

Shkelja e rregullave të fluturimit ajror

(Ndryshuar togfjalësh në paragrafin e dytë me ligjin nr. 8919, datë 4.7.2002)

Shkelja nga ushtaraku e rregullave të fluturimit dhe të përgatitjes së teknikës së fluturimit, kur nga këto janë shkaktuar vdekja ose pasoja të tjera të rënda, dënohet me burgim deri në pesëmbëdhjetë vjet.

Po këto vepra të kryera në gjendje lufte ose në gjendje të jashtëzakonshme dënohen jo më pak se pesë vjet.

Neni 84

Shkelja e rregullave të lundrimit të anijeve

(Ndryshuar togfjalësh në paragrafin e dytë me ligjin nr. 8919, datë 4.7.2002)

Shkelja nga ushtaraku e rregullave të lundrimit të anijeve dhe të përgatitjes së lundrimit, kur nga këto vepra janë shkaktuar vdekje ose pasoja të tjera të rënda, dënohet me burgim deri në pesëmbëdhjetë vjet.

Po kjo vepër e kryer në gjendje lufte ose gjendje të jashtëzakonshme dënohet me burgim jo më pak se pesë vjet.

Neni 85

Mosdhënia e ndihmës nga kapiteni i anijes ushtarake

Mosdhënia e ndihmës nga kapiteni i anijes ushtarake njerëzve që janë duke u mbytur në det ose në ujërat e tjera, kur kjo ndihmë mund të jepet pa rrezik serioz për anijen dhe ekuipazhin, dënohet me gjobë, nxjerrje në lirim ose me burgim deri në tre vjet.

Neni 86

Shkelja e rregullave në drejtimin dhe shfrytëzimin e makinave luftarake
(Ndryshuar togfjalësh në paragrafin e dytë me ligjin nr. 8919, datë 4.7.2002)

Shkelja e rregullave në drejtimin dhe shfrytëzimin e makinave luftarake, kur nga këto vepra janë shkaktuar vdekje ose pasoja të tjera të rënda, dënohet me burgim deri në pesëmbëdhjetë vjet.

Po kjo vepër e kryer në gjendje lufte ose gjendje të jashtëzakonshme dënohet me burgim jo më pak se pesë vjet.

KREU VIII

VEPRA PENALE NË KUSHTET E OPERACIONEVE USHTARAKE

Neni 87

Shmangia nga urdhërat për luftim

Shmangia me dashje e komandantit nga urdhërat që i janë dhënë për luftim, e kryer jo me qëllim favorizimi të armikut, por në kundërshtim me rregullat ushtarake, dënohet me burgim nga tre deri në dhjetë vjet.

Po këto vepra, kur kanë sjellë pasoja të rënda, dënohen me burgim jo më pak se dhjetë vjet.

Neni 87/a

Përdorimi i mjeteve luftarake të ndaluara

(Shtuar me ligjin nr. 8919, datë 4.7.2002)

Përdorimi nga ushtarakët i mjeteve ose i mënyrave të luftimit të ndaluara nga ligjet ose marrëveshjet ndërkombëtare, në të cilat vendi ynë është palë, kur kanë sjellë pasoja të rënda, dënohet me burgim nga pesë deri në dhjetë vjet.

Dhënia e urdhrit për përdorimin e mjeteve dhe mënyrave të ndaluara të luftimit, dënohet me burgim nga pesë deri në njëzet vjet.

Neni 88

Largimi nga fusha e betejës dhe dorëzimi rob

Largimi pa të drejtë nga fusha e betejës në kohë luftimi ose refuzimi për të vepruar në kohë luftimi, si dhe dorëzimi rob, dënohet me burgim jo më pak se dhjetë vjet.

Neni 89

Humbja e flamurit

Ushtaraku, që nga pakujdesia humb flamurin në luftë, dënohet me burgim nga tre deri në dhjetë vjet.

Braktisja e flamurit në luftë ose dorëzimi i tij armikut dënohet me burgim jo më pak se dhjetë vjet.

Neni 90

Lënia e një anijeje lufte në mbytje e sipër

Lënia e një anijeje lufte që është në mbytje e sipër, nga ana e komandantit që nuk ka kryer deri në fund detyrat e veta të shërbimit, si dhe nga ana e personave të ekuipazhit të anijes pa urdhrin përkatës të komandantit, dënohet me burgim jo më pak se dhjetë vjet.

Neni 91

Vazhdimi i veprimeve luftarake pas armpushimit
(Ndryshuar fjalë në titull dhe në paragraf me ligjin nr. 8919, datë 4.7.2002)

Cilido që vazhdon veprimet luftarake pasi është shpallur zyrtarisht armëpushimi ose pagja ose shkel me mënyra të ndryshme kushtet e armpushimit që janë bërë të njohura, dënohet me gjobë, nxjerrje në lirim ose me burgim deri në pesë vjet.

Neni 92

Sjellja brutale me të plagosurit, me të sëmurët dhe robërit e luftës
(Ndryshuar me ligjin nr. 8919, datë 4.7.2002)

Sjellja brutale me të plagosurit, me të sëmurët ose me robërit e luftës ose bërja e pamundur ose pengimi që të shfrytëzojë të drejtat e tyre të garantuara, sipas marrëveshjeve ndërkombëtare të pranuara nga shteti shqiptar, dënohet me burgim deri në tre vjet.

Neni 93

Lënia e të plagosurve

Lënia e të plagosurve në fushën e luftës nga ana e personave që janë të detyruar t'i tërheqin, dënohet me burgim nga dy deri në dhjetë vjet.

Neni 94

Vrasja ose plagosja e personave të kapur rob
(Ndryshuar paragrafi i parë me ligjin nr. 8919, datë 4.7.2002)

Cilido që, duke shkelur dispozitat e marrëveshjeve ndërkombëtare të pranuara nga shteti shqiptar, kryen vrasje ose plagosje të rëndë të armikut që i ka dorëzuar armët, që është dorëzuar pa kushte, ose që nuk ka mjete për t'u mbrojtur, dënohet me burgim nga tre deri në dhjetë vjet.

Keqtrajtimi i kufomës së armikut përbën kundërvajtje penale dhe dënohet me burgim deri në dy vjet.

Neni 95

Mbajtja pa të drejtë e shenjave të shërbimit shëndetsor në ushtri

Mbajtja e emblemës së Kryqit të kuq ose të gjysmë hënës së kuqe në zonat e operacionit ushtarak nga persona që nuk kanë të drejtë, si dhe dhënia e urdhrit nga ana e eprorëve për mbajtjen e tyre pa të drejtë, përbën kundërvajtje penale dhe dënohet me ulje në gradë, me gjobë ose me burgim deri në një vit.

Neni 96

Shpërdorimi i shenjave të shërbimit shëndetsor
(Ndryshuar me ligjin nr.

Shpërdorimi në kohë lufte i flamurëve dhe emblemave të kryqit të kuq dhe gjysmë hënës së kuqe ose të ngjyrës së adoptuar të mjeteve të transportit të shërbimit shëndetësor, përbën kundërvajtje penale dhe dënohet me ulje në gradë, me gjobë ose me burgim deri në një vit.

Neni 97

Dëmtimi ose shkatërrimi i mjeteve të Kryqit të Kuq

Dëmtimi ose shkatërrimi në kohë lufte ose në gjendje të jashtëzakonshme i mjeteve ose materialeve, që i përkasin Kryqit të Kuq ose Gjysmë Hënës së Kuqe, dënohet me burgim deri në pesë vjet.

Kur këto vepra kanë shkaktuar pasoja të rënda dënohen me burgim nga pesë deri në pesëmbëdhjetë vjet.

DISPOZITA TË FUNDIT

Neni 98

Shfuqizohet tërësisht ligji nr. 5591, datë 15.6.1977 për Kodin Penal të Republikës Popullore Socialiste të Shqipërisë me gjithë shtesat e ndryshimet e mëvonshme.

Neni 99

Rregullat e përcaktuara në ligjin nr. 7941, datë 31.5.1995 “Për hyrjen në fuqi të ligjit nr. 7895 datë 27.1.1995 “Për Kodin Penal të Republikës së Shqipërisë””, me ndryshimet e mëvonshme do të zbatohen edhe për këtë Kod.

Neni 100

Ky Kod hyn në fuqi më 15 nëntor 1995.

Shpallur me dekretin nr. 1257, datë 30.10.1995 të Presidentit të Republikës së Shqipërisë, Sali Berisha.